

# **BERGRIVIER MUNISIPALITEIT**

## **VERORDENING INSAKE ELEKTRISITEITSVOORSIENING**

Kragtens die bepalings van artikel 156 van die Grondwet van Suid-Afrika, 1996, bepaal die Bergrivier Munisipaliteit hiermee soos volg:

### **Inhoud**

1. Woordomskrywing

#### **HOOFSTUK 1: ALGEMENE VOORWAARDES VIR VOORSIENING**

2. Voorsiening van elektrisiteitsdienste

3. Voorsiening volgens ooreenkoms

4. Betekening van kennisgewing

5. Nakoming van kennisgewings

6. Aansoek om voorsiening van elektrisiteit

7. Verwerking van aansoeke om voorsiening

8. Deurgangsregte

9. Statutêre serwituut

10. Reg van toegang om inspeksie te doen, te toets of instandhoudingswerk te doen

11. Weiering of versuim om inligting te verstrek

12. Weiering van toegang

13. Onbehoorlike verbruik

14. Elektrisiteitstariewe

15. Deposito's

16. Betaling van tariewe

17. Rente op agterstallige rekeninge

18. Beginsels vir die herverkoop van elektrisiteit

19. Reg om die toevoer van elektrisiteit af te sluit

20. Nie-aanspreeklikheid van die munisipaliteit

21. Lekkasie van elektrisiteit

22. Onderbreking van toevoer

23. Seëls van die munisipaliteit

24. Peuter met diensaansluiting of hoofleiding

25. Beveiliging van die munisipaliteit se hoofleiding

26. Voorkoming van peuter met die diensaansluiting of hoofleiding

27. Ongemagtigde aansluitings

28. Ongemagtigde heraansluiting

29. Tydelike afsluiting en heraansluiting

30. Tydelike voorsiening van elektrisiteit

31. Tydelike werk
  32. Lasvermindering
  33. Hoë-, medium- en laagspanning skakeltuig en toerusting
  34. Substasie-akkommodasie
  35. Bedradingsdiagram en spesifikasie
  36. Bystandstoevoer
  37. Verbruiker se toerusting vir noodbystandstoevoer
  38. Omsendbriewe
- HOOFSTUK 2: VERBRUIKERS SE VERANTWOORDELIKHEDE
39. Verbruiker moet elektriese installasie oprig en in stand hou
  40. Fout in elektriese installasie
  41. Beëindiging van die verbruik van die toevoer van elektrisiteit
  42. Verandering van okkupeerder .
  43. Diensapparaat
- HOOFSTUK 3: SPESIFIEKE VOORSIENINGSVOORWAARDES
44. Diensaansluiting
  45. Meterakkommodasie
- HOOFSTUK 4: TOEVOERSTELSELS
46. Lasvereistes
  47. Lasbeperkings
  48. Steuring van ander persone se elektriese toerusting
  49. Toevoer na motore
  50. Kragfaktor
  51. Beveiliging
- HOOFSTUK 5: ELEKTRISITEITSMETING
52. Meet van toevoer
  53. Akkurate meting
  54. Lees van kredietmeters
  55. Kragbegroter
- HOOFSTUK 6: ELEKTRIESE KONTRAKTEURS
56. Elektriese Kontrakteurs
  57. Aanspreeklikheid
- HOOFSTUK 7: KOSTE VAN WERK
58. Koste van Werk
- HOOFSTUK 8: ENERGIEBEPARINGSMAATREËLS EN VERMINDERDE GEBRUIK VAN ELEKTRISITEIT
59. Norme, riglyne en standaarde
- HOOFSTUK 9: ALGEMENE BEPALINGS
60. Vrstellings
  61. Skakelforums in gemeenskap

- 62. Appél
- 63. Strafbepalings
- 64. Teenstrydigheid met ander wetgewing
- 65. Herroeping van Verordeninge
- 66. Kort titel en inwerkingtrede

## 1. Woordskrywing

In hierdie verordening, tensy uit die samehang anders blyk, beteken –

**"bewys"** die noodsaaklike element van 'n kragbegroterstelsel wat gebruik word om inligting oor te dra van 'n verkooppunt vir elektrisiteitkrediet na 'n kragbegroter en *vice versa*;

**"bystandstoevoer"** 'n alternatiewe toevoer van elektrisiteit wat nie gewoonlik deur die verbruiker verbruik word nie;

**"die Wet"** enige toepaslike wet, proklamasie, ordonnansie, wet van die Parlement of wetsbepaling wat regs krag het;

**"diensaansluiting"** al die kables en toerusting wat nodig is om die hoofleiding by die verbruiker se elektriese installasie aan te sluit by die voorsieningspunt;

**"diensbeveiligingstoestel"** enige sekering of stroombreker wat geïnstalleer word met die doel om die munisipaliteit se toerusting te beskerm teen oorbelasting of foute wat op die installasie of op die interne diensaansluiting voorkom;

**"eienaar"** met betrekking tot 'n perseel, die persoon by wie die regstitel daarvan berus; met dien verstande dat –

- (a) in die geval van onroerende eiendom –
  - (i) wat vir 'n tydperk van minstens 50 jaar verhuur word, ongeag of die huurkontrak geregistreer is of nie, die huurder daarvan, of
  - (ii) wat voordelig geokkupeer word kragtens 'n serwituut of reg analoog daarmee, die okkupeerder daarvan;
- (b) indien die eienaar soos hierbo omskryf –
  - (i) dood of insolvent is, sy of haar boedel tot voordeel van sy of haar skuldeisers afgestaan het, ingevolge 'n hofbevel onder kuratele geplaas is, of 'n maatskappy is wat gelikwieder of onder geregtelike bestuur geplaas is, die persoon by wie die administrasie van sodanige eiendom berus as eksekuteur, administrateur, trustee, regverkrygende, kurator, likwidateur of geregtelike bestuurder, na gelang van die geval, of
  - (ii) nie in die Republiek van Suid-Afrika aanwesig is nie, of indien sy of haar adres aan die munisipaliteit onbekend is,

iemand wat as agent of andersins die huurgeld ten opsigte van sodanige eiendom ontvang of geregtig is om dit te ontvang, en

- (iii) indien die munisipaliteit nie kan vasstel wie sodanige persoon is nie, word die persoon wat geregtig is op die voordelige gebruik van sodanige eiendom geag die eienaar daarvan te wees met die uitsluiting van die persoon by wie die regstittel daarvan berus;

**"elektriese installasie"** 'n elektriese installasie soos omskryf in die Regulasies;

**"elektriese kontrakteur"** 'n elektriese kontrakteur soos omskryf in die Regulasies;

**"geakkrediteerde persoon"** 'n persoon wat ingevolge die Regulasies na gelang van die geval as 'n elektriese toetsers vir enkelfase, 'n installasie-elektrisiën of 'n meesterinstallasie-elektrisiën, geregistreer is;

**"hoogspanning"** die stel nominale spanningsvlakke wat in kragstelsels vir grootmaattransmissie van elektrisiteit in die omgewing van  $44 \text{ kV} < U_n \leq 220 \text{ kV}$  gebruik word.[SANS 1019];

**"hoofleiding"** enige deel van die munisipaliteit se elektrisiteitsnetwerk;

**"kragbegroter"** 'n vooruitbetaalmeter wat geprogrammeer kan word om die vloeï van hoeveelhede vooruitbetaalde energie in 'n elektriese stroomkring toe te laat;

**"kredietmeter"** 'n meter waar 'n rekening uitgerek word nadat elektrisiteit verbruik is;

**"laagspanning"** die stel nominale spanningsvlakke wat gebruik word vir die verspreiding van elektrisiteit en waarvan die boonste perk oor die algemeen aanvaar word as 'n ws-spanning van 1000 V (of 'n gs-spanning van 1500 V).[SANS 1019];

**"medium spanning"** die stel nominale spanningsvlakke bo laagspanning en benede hoogspanning in die omgewing van  $1 \text{ kV} < U_n \leq 44 \text{ kV}$  [SANS 1019];

**"meetpunt"** die punt waar die verbruiker se elektrisiteitsverbruik gemeet word en wat by die voorsieningspunt of by enige ander punt op die verspreidingsstelsel van die munisipaliteit of die elektriese installasie van die verbruiker kan wees soos deur die munisipaliteit of enige behoorlik gemagtigde amptenaar van die munisipaliteit aangedui met dien verstande dat dit alles, en slegs, die verbruiker se verbruik van elektrisiteit meet;

**"meter"** 'n toestel wat die aanvraag of die elektriese energie wat verbruik word, aandui en dit behels ook konvensionele meters en kragbegroters;

**"motoraansitstroom"** met betrekking tot wisselstroommotore, die gemiddelde vierkantwortelwaarde van die simmetriese stroom wat deur 'n motor verbruik word wanneer dit aangedryf word volgens die geraamde spanning daarvan met die aansitter in aansitposisie en die rotor gesluit;

**"motorlas totaal aangeskakel"** die somtotaal van die kW-vermoë van al die afsonderlike motore wat by 'n installasie aangesluit is;

**"motorvermoë"** die maksimum aanhoudende kW-lewering van 'n motor soos vermeld op die vervaardiger se kenplaatjie;

**"munisipaliteit"** beteken die Bergrivier Munisipaliteit, ingestel kragtens artikel 12 van die Munisipale Strukturewet, 117 van 1998, en sluit in enige politieke struktuur, politieke ampsdraer, raadslid, behoorlik gemagtigde agent of enige amptenaar wat ingevolge hierdie verordening handel kragtens 'n bevoegdheid van die munisipaliteit wat gedelegeer is of gesubdelegeer is aan sodanige politieke struktuur, politieke ampsdraer, raadslid, agent of amptenaar;

**"nakomingsertifikaat"** 'n sertifikaat wat ingevolge die Regulasies ten opsigte van 'n elektriese installasie of gedeelte van 'n elektriese installasie deur 'n geakkrediteerde persoon uitgereik word;

**"okkupeerder"** met betrekking tot 'n perseel –

- (a) iemand wat sodanige perseel werklik okkupeer;
- (b) iemand wat wetlik daarop geregtig is om sodanige perseel te okkupeer;
- (c) in geval van sodanige perseel wat onderverdeel is en wat aan loseerders of verskillende huurders verhuur word, die persoon wat die huurgeld ontvang wat deur sodanige loseerders of huurders betaalbaar is, hetsy vir sy of haar eie rekening of as agent vir iemand wat daarop geregtig is of belang daarby het, of
- (d) iemand wat by die beheer of bestuur van sodanige perseel betrokke is, en behels ook die agent van sodanige persoon wanneer hy of sy nie in die Republiek aanwesig is, of as sy of haar verblyfplek onbekend is;

**"perseel"** enige grond of enige struktuur bo of benede grondvlak en behels ook enige voertuig, vliegtuig of vaartuig;

**"Regulasies"** die Regulasies opgestel ingevolge die Wet op Beroepsgesondheid en -Veiligheid, 1993 (Wet 85 van 1993), soos gewysig;

**"spanning"** die gemiddelde vierkantswortelwaarde van elektriese potensiaal tussen twee geleiers;

**"tarief"** die munisipaliteit se tarief gehef vir die voorsiening van elektrisiteit;

**"toepaslike standaardspesifikasie"**

SANS 1019 Standaardspanning, - stroomkring en isolasievlakke vir die toevoer van elektrisiteit;

SABS 1607 Elektromeganiese watt-uurmeters;

SABS 1524 Dele 0,1 & 2 – Kragbegroterstelsels;

SABS IEC 60211 Maksimumaanvraagaanwysers, Klas 1.0;

SABS IEC 60521 Wisselstroom-elektromeganiese-watt-uurmeter (Klasse 0,5,1 & 2);

SANS 10142-1 Gebruikskode vir die bedrading van persele;

NRS 047 Nasionale gerasionaliseerde spesifikasie vir elektrisiteitsvoorsiening – gehalte van diens;

NRS 048 Nasionale gerasionaliseerde spesifikasie vir elektrisiteitsvoorsiening – gehalte van diens, en

NRS 057 Meet van elektrisiteit: minimum vereistes;

**"veiligheidsstandaard"** die Gebruikskode vir die Bedrading van Persele SANS 10142-1 geïnkorporeer in die Regulasies;

**"verbruiker"**, met betrekking tot 'n perseel –

- (i) enige okkupeerder daarvan of enige ander persoon met wie die munisipaliteit ooreengekom het om elektrisiteit daar te voorsien of dit inderdaad daar voorsien; of
- (ii) indien sodanige perseel nie bewoon word nie, iemand wat 'n geldige bestaande ooreenkoms met die munisipaliteit het vir die voorsiening van elektrisiteit aan sodanige perseel, of
- (iii) indien daar geen sodanige persoon of okkupeerder is nie, die eienaar van die perseel;

**"verbruikspunt"** 'n verbruikspunt soos omskryf in die Regulasies.

**"voorsieningspunt"** die punt soos bepaal deur die munisipaliteit of enige ander behoorlik gemagtigde amptenaar van die munisipaliteit vanwaar elektrisiteit aan enige perseel deur die munisipaliteit voorsien word;

## HOOFSTUK 1

### ALGEMENE VOORWAARDES VIR VOORSIENING

#### 2. Voorsiening van elektrisiteitsdienste

Slegs die munisipaliteit mag elektrisiteit voorsien of 'n ooreenkoms aangaan om elektrisiteit binne die munisipaliteit se jurisdiksie te voorsien, behalwe in gebiede waar Eskom die enigste voorsiener van elektrisiteitsdienste is.

### **3. Voorsiening volgens ooreenkoms**

Niemand mag gebruik maak of voortgaan om gebruik te maak van 'n toevoer van elektrisiteit van die munisipaliteit nie, tensy of totdat sodanige persoon 'n skriftelike ooreenkoms met die munisipaliteit vir sodanige toevoer aangegaan het, en sodanige toevoer word in alle opsigte deur sodanige ooreenkoms saam met die bepalings van hierdie verordening beheer. As 'n persoon 'n toevoer van elektrisiteit verbruik sonder om 'n ooreenkoms aan te gaan, is hy of sy aanspreeklik vir die koste van die elektrisiteit soos uiteengesit in artikel 44 van hierdie verordening.

### **4. Betekening van kennisgewing**

(1) Enige kennisgewing of ander dokument word geag as aan iemand beteken te wees wanneer dit ingevolge hierdie verordening aan iemand beteken is indien –

- (a) dit persoonlik by daardie persoon afgelewer is;
- (b) dit by daardie persoon se woonplek of sakeonderneming in die Republiek gelaat is by 'n persoon wat klaarblyklik ouer as sestien jaar is;
- (c) dit per geregistreerde of gesertifiseerde pos na daardie persoon se laaste bekende woonadres of sakeadres in die Republiek ge-pos is en 'n erkenning dat dit ge-pos is van die posdiens verkry is;
- (d) indien daardie persoon se adres in die Republiek onbekend is, wanneer dit op daardie persoon se agent of verteenwoordiger in die Republiek beteken word op 'n manier bepaal in paragrafe (a), (b) of (c); of
- (e) daardie persoon se adres en agent of verteenwoordiger in die Republiek onbekend is, wanneer dit op 'n opsigtelike plek ge-pos is op die eiendom of perseel, indien enige, waarmee dit verband hou.

(2) Wanneer enige kennisgewing of ander dokument gemagtig of beteken word op die eienaar, okkupeerder of houer van enige eiendom of regte in enige eiendom, is dit voldoende as daardie persoon in die

kennisgewing of ander dokument beskryf word as die eienaar, okkupeerder of houer van die eiendom of betrokke reg, en is dit nie nodig om daardie persoon se naam te verstrek nie.

(3) Enige regsproses is doeltreffend en voldoende aan die munisipaliteit beteken as dit by die munisipale bestuurder se kantoor afgelewer word of by 'n persoon wat by die munisipale bestuurder se kantoor ter beskikking is.

## **5. Nakoming van kennisgewings**

Iemand aan wie 'n kennisgewing wat behoorlik uitgereik of gegee is ingevolge hierdie verordening, beteken word, moet die bepalings daarvan binne die tydperk wat daarin vermeld word, nakom.

## **6. Aansoek om voorsiening van elektrisiteit**

(1) Aansoek om die voorsiening van elektrisiteit moet skriftelik deur die voornemende verbruiker op die voorgeskrewe vorm verkrygbaar by die kantoor van die munisipaliteit gedoen word en die installasie se geraamde las in kV.A moet op die aansoek vermeld word. Sodanige aansoek moet gerig word so gou as moontlik voor die toevoer verlang word ten einde die werk van die munisipaliteit te vergemaklik.

(2) 'n Aansoek om voorsiening van elektrisiteit vir 'n tydperk van minder as 'n jaar word beskou as 'n aansoek om 'n tydelike voorsiening van elektrisiteit en word oorweeg na goeëdunke van die munisipaliteit of enige behoorlik gemagtigde amptenaar van die munisipaliteit wat enige spesiale voorwaardes mag stel wat in sodanige geval nagekom moet word.

## **7. Verwerking van aansoeke om voorsiening**

Aansoeke om die voorsiening van elektrisiteit word verwerk en die toevoer beskikbaar gestel binne die tydperke soos in NRS 047 aangedui.

## **8. Deurgangsregte**

(1) Die munisipaliteit kan weier om 'n diensaansluiting bo of onder die grond op te rig of te lê op enige deurgang wat nie onder berusting van die munisipaliteit is nie of op enige private eiendom, tensy en totdat die voornemende verbruiker die skriftelike toestemming verkry het van die eienaar van die genoemde private eiendom of van die persoon by wie die regstitel van die grond berus waarop enige sodanige deurgang soos bogemeld, bestaan, na gelang van die geval, en dit by die munisipaliteit

ingedien het, waardeur magtiging vir die lê of oprigting van 'n diensaansluiting daarop verleen word.

(2) As sodanige toestemming op enige tydstip teruggetrek word of as die bogemelde private eiendom of deurgang van eienaar verwissel en die nuwe eienaar weier om sodanige toestemming te verleen of te laat voortduur, moet die koste van enige verandering wat aan die diensaansluiting aangebring moet word ten einde die toevoer van elektrisiteit in stand te hou, en van die verwydering daarvan wat onder omstandighede nodig mag wees, deur die verbruiker van die perseel waarna die toevoer voortgesit word, gedra word.

## **9. Statutêre serwituut**

(1) Onderworpe aan die bepalings van subartikel (3) mag die munisipaliteit binne sy munisipale gebied:

- (a) elektrisiteitsdienste voorsien, vestig en in stand hou;
- (b) hoofleiding vir elektrisiteit verkry, oprig, lê, verleng, vergroot, omlei, in stand hou, herstel, die verbruik beëindig, sluit en vernietig;
- (c) enige hoofleiding vir elektrisiteit aanlê, oprig of lê op, oor, deur, bo of onder enige straat of onroerende eiendom en die eienaarskap van enige sodanige hoofleiding moet by die munisipaliteit berus;
- (d) enigiets anders doen wat nodig of wenslik is vir of bykomstig of aanvullend tot of ondergeskik aan enige saak soos bedoel in subartikels (a) tot (c).

(2) Indien die munisipaliteit enige hoofleiding vir elektrisiteit aanlê, oprig of lê op, oor, deur, bo of onder enige straat of onroerende eiendom wat nie aan die munisipaliteit behoort of nie deur die munisipaliteit beheer of bestuur word nie, betaal die munisipaliteit die eienaar van sodanige straat of eiendom vergoeding volgens 'n bedrag waaroor die eienaar en die munisipaliteit ooreengekom het of, by afwesigheid van 'n ooreenkoms, soos óf deur arbitrasie óf deur 'n geregshof bepaal.

(3) Die munisipaliteit, voordat dit begin met enige werk behalwe herstelwerk of instandhouding aan of in verband met enige toevoer van elektrisiteit op onroerende eiendom wat nie aan die munisipaliteit behoort nie, gee die eienaar of okkupeerder van sodanige eiendom redelike kennis van die voorgestelde werk en die datum waarop die munisipaliteit beoog om met sodanige werk te begin.

## **10. Reg van toegang om inspeksie te doen, te toets of instandhoudingswerk te doen**

(1) Die munisipaliteit, deur sy werknemers, kontrakteurs en hul assistente en adviseurs, het toegang tot en oor enige eiendom ten einde:

- (a) enigiets te doen wat gemagtig is of vereis word om deur die munisipaliteit ingevolge hierdie verordening of enige ander wet gedoen te word;
- (b) enige dienshoofleiding en enigiets wat daarmee verband hou te inspekteer en te ondersoek;
- (c) navraag te doen oor enige moontlike bron van toevoer van elektrisiteit of die geskiktheid van onroerende eiendom vir enige skema of onderneming van die munisipaliteit, en enige nodige opname in verband daarmee te doen;
- (d) vasstel of daar enige oortreding van die bepalings van hierdie verordening of enige ander wet is of was, en
- (e) nakoming van die bepalings van hierdie verordening of enige ander wet af te dwing.

(2) Die munisipaliteit betaal aan iemand wat skade gely het as gevolg van die uitoefening van die reg van toegang ingevolge subartikel (1), behalwe waar die munisipaliteit gemagtig is om op die betrokke eiendom enige werk te verrig op die koste van sodanige persoon of enige ander persoon, skadevergoeding ten bedrae van 'n bedrag waarop die munisipaliteit en sodanige persoon ooreengekom het of, as daar nie 'n ooreenkoms aangegaan is nie, soos deur arbitrasie of 'n geregshof bepaal kan word.

(3) 'n Werknemer van die munisipaliteit wat deur sodanige munisipaliteit daartoe gemagtig is, kan deur 'n skriftelike kennisgewing aan die eienaar of okkupeerder van enige eiendom te beteken, van sodanige eienaar of okkupeerder vereis om op die dag en uur soos in sodanige kennisgewing aangedui, toegang tot sodanige eiendom aan 'n persoon en vir 'n doel soos beoog in subartikel (1) te verskaf.

(4) Die munisipaliteit kry sonder kennisgewing toegang tot en oor enige eiendom en kan op enige wyse optree soos wat, volgens sy mening, nodig of wenslik is as daar 'n staat van oorlog is, of enige ramp, noodtoestand of ramspoed voorkom.

## **11. Weiering of versuim om inligting te verstrek**

Niemand mag weier of versuim om sodanige inligting te verstrek wat 'n behoorlik gemagtigde amptenaar van die munisipaliteit redelikerwys van

hom of haar verlang nie, of vals inligting aan enige sodanige amptenaar verstrek insake enige installasiewerk wat voltooi is of beoog word nie.

## **12. Weiering van toegang**

Niemand mag enige behoorlik gemagtigde amptenaar van die munisipaliteit in die uitvoering van sy of haar pligte ingevolge hierdie verordening of van enige pligte wat daarmee verband hou of in verband daarmee staan nie opsetlik hinder, belemmer, in die pad staan of toegang weier nie.

## **13. Onbehoorlike verbruik**

As die munisipaliteit redelike gronde het om te glo dat die verbruiker die elektrisiteit vir enige doel of op enige wyse gebruik wat op 'n onbehoorlike en onveilige wyse inmeng of daarop bereken is om op 'n onbehoorlike en onveilige wyse in te meng met die doeltreffende voorsiening van elektrisiteit aan enige verbruiker, kan die munisipaliteit met of sonder kennisgewing sodanige toevoer afsluit, maar sodanige toevoer word weer herstel sodra die oorsaak van die afsluiting permanent reggestel of verwyder is. Die verbruiker betaal die tarief soos deur die munisipaliteit voorgeskryf vir die afsluiting en aansluiting voor die toevoer van elektrisiteit herstel word, tensy dit bewys kan word dat die verbruiker nie die elektrisiteit op 'n onbehoorlike of onveilige wyse verbruik of hanteer het nie.

## **14. Elektrisiteitstariewe**

Afskrifte tariewe is gratis by die munisipaliteit se kantore verkrygbaar.

## **15. Deposito's**

Die munisipaliteit behou die reg voor om te vereis dat die verbruiker 'n som geld deponeer as sekuriteit vir die betaling van enige tarief wat aan die munisipaliteit betaalbaar of is of betaalbaar kan word. Die bedrag van die deposito ten opsigte van elke elektrisiteitinstallasie word deur die munisipaliteit bepaal en elke sodanige deposito kan verhoog indien dit na die munisipaliteit se mening onvoldoende is. Sodanige deposito word nie beskou as betaling of gedeeltelike betaling van enige rekeninge betaalbaar vir die voorsiening van elektrisiteit met die doel om enige afslag te kry ooreenkomstig die elektrisiteitstariewe gemeld in hierdie verordening nie. By beëindiging van die toevoer van elektrisiteit word die bedrag van sodanige deposito rentevry en min enige betalings aan die munisipaliteit verskuldig, aan die verbruiker terugbetaal.

## **16. Betaling van tariewe**

(1) Die verbruiker is aanspreeklik vir alle tariewe aangedui in die voorgeskrewe tariewe vir die elektrisiteitsdiens soos deur die munisipaliteit goedgekeur.

(2) Alle rekeninge word geag betaalbaar te wees wanneer dit deur die munisipaliteit uitgereik word, en die betaaldatum moet op die voorkant van die elke rekening verskyn asook 'n waarskuwing wat aandui dat die toevoer van elektrisiteit afgesluit kan word indien die tarief ten opsigte van sodanige toevoer nie betaal is na die betaaldatum nie.

(3) Enige fout of weglating in enige rekening of versuim om 'n rekening te lewer, onthef nie die verbruiker van sy of haar verpligting om die regte bedrag te betaal verskuldig vir die elektrisiteit wat aan die perseel voorsien is nie, en die onus rus op die verbruiker om hom of haar daarvan te vergewis dat die rekening wat gelewer is, ooreenkomstig die voorgeskrewe tariewe is ten opsigte van elektrisiteit aan die perseel voorsien.

(4) Waar 'n behoorlik gemagtigde amptenaar van die munisipaliteit die perseel besoek met die doel om die toevoer van elektrisiteit af te sluit ingevolge subartikel (2) en hy of sy word op enige wyse verhinder of verhoed om die afsluiting te bewerkstellig, is die voorgeskrewe tarief betaalbaar vir elke besoek wat nodig is om sodanige afsluiting te bewerkstellig.

(5) Nadat die elektrisiteit afgesluit is weens die wanbetaling van 'n rekening, is die voorgeskrewe tarief en enige bedrae verskuldig vir elektrisiteit wat verbruik is, betaalbaar voordat die toevoer van elektrisiteit weer aangesluit kan word.

## **17. Rente op agterstallige rekeninge**

Die munisipaliteit kan rente hef op rekeninge wat nie betaal is teen die betaaldatum soos dit op die rekening verskyn nie, teen 'n rentekoers wat van tyd tot tyd deur die munisipaliteit goedgekeur word.

## **18. Beginsels vir die herverkoop van elektrisiteit**

(1) Tensy anders skriftelik deur die munisipaliteit gemagtig, mag niemand elektrisiteit wat volgens 'n ooreenkoms met die munisipaliteit aan sy of haar perseel voorsien word, aan enige ander persoon verkoop of voorsien vir verbruik op ander persele nie, of toelaat of duld dat sodanige herverkoop of voorsiening plaasvind nie. As elektrisiteit herverkoop word vir verbruik op dieselfde perseel, word die elektrisiteit deur 'n

submeter gemeet van die soort wat deur die Suid-Afrikaanse Buro van Standaard voorsien, geïnstalleer en geprogrammeer word ooreenkomstig die munisipaliteit se standaard.

(2) Die tariewe waarteen en die verkoopvoorwaardes ingevolge waarvan die elektrisiteit dus herverkoop word, is nie minder gunstiger vir die koper as daardie wat betaalbaar en van toepassing sou wees indien die munisipaliteit elektrisiteit direk aan die koper voorsien nie. Elke herverkoper verskaf aan die koper maandelikse state wat ten minste net soveel besonderhede bevat as die tersaaklike besonderhede oor rekeninginligting wat die munisipaliteit aan sy elektrisiteitverbruikers verskaf.

### **19. Reg om die toevoer van elektrisiteit af te sluit**

(1) Die raad het die reg om die toevoer van elektrisiteit na enige perseel af te sluit indien die persoon wat aanspreeklik is vir die betaling van sodanige toevoer, in gebreke bly om enige bedrag wat aan die munisipaliteit verskuldig is in verband met enige toevoer wat hy of sy te eniger tyd van die raad ontvang het ten opsigte van enige perseel, of waar enige van die bepalings van hierdie verordening of Regulasies oortree word, met dien verstande dat die munisipaliteit die persoon 14 (veertien) dae kennis gee om sy of haar fout reg te stel en die persoon versuim om sodanige fout reg te stel nadat kennis gegee is, of in die geval van ernstige gevaar vir persoon of eiendom, of ingevolge artikel 26 van hierdie verordening, sonder kennisgewing. Nadat die toevoer van elektrisiteit weens wanbetaling van rekeninge of die onbehoorlike en onveilige verbruik van elektrisiteit afgesluit is, moet die voorgeskrewe tarief aan die munisipaliteit betaal word.

(2) Indien 'n installasie op die verbruiker se perseel ongemagtig heraangesluit word nadat dit voorheen regmatig deur die munisipaliteit afgesluit is, of indien daar met die munisipaliteit se elektriese toerusting gepeuter word om te verhoed dat die meter die volle verbruik registreer, kan die toevoer van elektrisiteit van daardie perseel verwyder word.

### **20. Nie-aanspreeklikheid van die munisipaliteit**

Die munisipaliteit is nie aanspreeklik vir enige regstreekse of daaruit voortspruitende verlies of skade wat deur die verbruiker gely of opgedoen word as gevolg van of voortspruitend uit die beëindiging en onderbreking van of enige ander abnormaliteit aan die toevoer van elektrisiteit nie, tensy dit deur nalatigheid aan die kant van die munisipaliteit veroorsaak is.

## **21. Lekkasie van elektrisiteit**

Onder geen omstandighede word enige korting op die rekening vir elektrisiteit wat voorsien en gemeet is, toegelaat ten opsigte van 'n vermorsing van elektrisiteit wat te wyte is aan 'n lekkasie of 'n ander fout in die elektriese installasie nie.

## **22. Onderbreking van toevoer**

Die munisipaliteit onderneem nie om aandag te skenk aan 'n onderbreking in die toevoer van elektrisiteit as dit as gevolg van 'n fout in die verbruiker se elektriese installasie is nie, behalwe wanneer sodanige onderbreking te wyte is aan die werking van die munisipaliteit se diensbeveiligingstoestel. Indien enige onderbreking van die toevoer van elektrisiteit die gevolg is van 'n fout in die verbruiker se elektriese installasie of van die gebrekkige werking van die appaarte wat in verband daarmee gebruik word, het die munisipaliteit die reg om die tarief van die verbruiker te verhaal soos voorgeskryf deur die munisipaliteit vir elke herstel van die toevoer van elektrisiteit bykomend tot die koste van die bywerk of herstel van enige skade wat aan die dienshoofleiding en – meter aangerig is deur sodanige fout of foutiewe werking soos bogemeld.

## **23. Seëls van die munisipaliteit**

Die meter, diensbeveiligingstoestelle en alle appaarte wat aan die munisipaliteit behoort, word deur 'n behoorlik gemagtigde amptenaar van die munisipaliteit verseël of gesluit en niemand wat nie 'n amptenaar van die munisipaliteit is wat behoorlik daartoe gemagtig is nie, mag op enige wyse of om enige rede hoegenaamd sodanige seëls of slotte verwyder, breek, skend, daaraan peuter om hom of haar daarmee bemoei nie.

## **24. Peuter met diensaansluiting of hoofleiding**

(1) Niemand mag op enige wyse of om enige rede hoegenaamd met enige meter, meettoerusting of dienshoofleiding of diensbeveiligingstoestel of hoofleiding van die munisipaliteit peuter of daarmee inmeng nie.

(2) Waar prima facie-bewys bestaan dat 'n verbruiker of iemand subartikel (1) oortree het, het die munisipaliteit die reg om die toevoer van elektrisiteit onmiddellik en sonder vooraf kennisgewing aan die verbruiker af te sluit. Die persoon is aanspreeklik vir alle tariewe en koste wat deur die munisipaliteit vir sodanige afsluiting gehef word.

(3) Waar 'n verbruiker of iemand subartikel (1) oortree en sodanige oortreding lei daartoe dat die meter minder verbruik as die regte verbruik registreer, het die munisipaliteit die reg om die volle koste van sy of haar geraamde verbruik van die verbruiker te verhaal.

## **25. Beveiliging van die munisipaliteit se hoofleiding**

(1) Niemand mag, behalwe met die munisipaliteit se goedkeuring en onderworpe aan sodanige voorwaardes as wat opgelê is, -

- (a) enige konstruksie bou, oprig of lê of die oprigting of lê van enige gebou, struktuur of ander voorwerp toelaat, of bome en ander plantegroei oor of in sodanige posisie of op sodanige manier plant wat sal inmeng met of die hoofleiding of dit bedreig nie;
- (b) enige deel van die hoofleiding uitgrawe, oopmaak of die grond bo, langsaan, onder of naby dit verwyder nie;
- (c) enige deel van die hoofleiding beskadig, bedreig, verwyder of vernietig nie, of enige daad pleeg wat na alle waarskynlikheid die hoofleiding sal beskadig, bedreig of enige deel daarvan vernietig nie; of
- (d) enige ongemagtigde aansluiting aan enige deel van die hoofleiding maak of elektrisiteit daarvandaan omlei of veroorsaak dat dit omgelei word nie;

(2) Die eienaar of okkupeerder moet die hoogte van die bome of die lengte van die takke wat uitsteek naby bogrondse lyne beperk of 'n wyse van beveiliging verskaf wat volgens die munisipaliteit voldoende daarin slaag om te verhoed dat die boom met die geleiers inmeng as die boom omval of n tak breek of 'n tak afgesny word. Indien die eienaar versuim om hierdie bepaling na te kom, het die munisipaliteit die reg, na vooraf skriftelike kennisgewing, of te eniger tyd in 'n noodgeval, om die bome of ander plantegroei af te sny of te snoei op so 'n wyse soos beoog in hierdie bepaling, en sal geregtig wees om die eiendom vir hierdie doel te betree.

(3) Die munisipaliteit mag, onderworpe aan die verkryging van 'n hofbevel, enige gebou, struktuur of enige ander voorwerp wat strydig met hierdie verordening gebou, opgerig of gelê is, afbreek, verander of op enige ander wyse daarmee handel.

(4) Die munisipaliteit mag in 'n noodgeval of ramp enigiets verwyder wat enige deel van die elektrisiteitsverspreidingstelsel beskadig, belemmer of bedreig of wat dit waarskynlik kan beskadig, belemmer, bedreig of vernietig.

## **26. Voorkoming van peuter met die diensaansluiting of hoofleiding**

Indien die munisipaliteit dit nodig of wenslik ag om spesiale voorsorgmaatreëls te tref om te verhoed dat daar aan enige deel van die hoofleiding, dienshoofleiding of diensbeveiligingstoestel of meter of meettoerusting gepeuter word, moet die verbruiker óf die nodige beveiliging verskaf en installeer, óf die betrokke koste betaal waar sodanige beveiliging deur die munisipaliteit verskaf word.

## **27. Ongemagtigde aansluitings**

Niemand behalwe 'n persoon wat spesifiek skriftelik deur die munisipaliteit daartoe gemagtig is nie sal regstreeks of onregstreeks enige elektriese installasie of deel daarvan by die hoofleiding of diensaansluiting kan aansluit, probeer aansluit of sodanige aansluiting veroorsaak of toelaat nie.

## **28. Ongemagtigde heraansluiting**

(1) Niemand behalwe 'n persoon spesifiek skriftelik deur die munisipaliteit daartoe gemagtig, mag enige elektriese installasie of installasies wat deur die munisipaliteit afgesluit is, weer by die hoofleiding of diensaansluiting heraansluit, probeer heraansluit of sodanige heraansluiting veroorsaak of toelaat nie.

(2) Wanneer daar gevind word dat die toevoer van elektrisiteit wat voorheen deur die munisipaliteit afgesluit is, weer aangesluit is, is die verbruiker wat die toevoer van elektrisiteit verbruik, aanspreeklik vir alle koste van die elektrisiteitsverbruik van die datum van afsluiting tot die datum toe daar gevind is dat die toevoer heraangesluit is, en ook vir enige ander koste wat in dié verband aangegaan is. Voorts behou die munisipaliteit die reg voor om enige deel van of al die toevoertoerusting te verwyder tot tyd en wyl volle betaling ontvang is. Die verbruiker is benewens dit ook verantwoordelik vir die koste wat met die herstel van sodanige toevoertoerusting gepaardgaan.

## **29. Tydelike afsluiting en heraansluiting**

(1) Die munisipaliteit moet op versoek van die verbruiker die toevoer van elektrisiteit na die verbruiker se elektriese installasie tydelik afsluit en dit weer heraansluit teen betaling van die tarief soos voorgeskryf deur die munisipaliteit vir elke afsluiting en daaropvolgende aansluiting.

(2) Indien die munisipaliteit genoodsaak word om die toevoer van elektrisiteit na 'n verbruiker se elektriese installasie tydelik af te sluit en

weer aan te sluit en die verbruiker is geensins verantwoordelik vir die ontstaan van hierdie noodsaak nie, moet die munisipaliteit die verbruiker kwytskeld van betaling van die bogemelde tarief.

(3) Die munisipaliteit mag slegs onder buitengewone omstandighede die toevoer van elektrisiteit na enige perseel sonder kennisgewing tydelik afsluit ten einde herstelwerk te doen of toetse uit te voer of vir enige ander regmatige doel. In alle ander gevalle moet die nodige kennis gegee word.

### **30. Tydelike voorsiening van elektrisiteit**

Dit moet 'n voorwaarde wees vir enige tydelike voorsiening van elektrisiteit ingevolge hierdie verordening dat, indien daar gevind word dat sodanige voorsiening inbreuk maak op die doeltreffende en ekonomiese toevoer van elektrisiteit na ander verbruikers, die munisipaliteit die reg het om, met kennisgewing, of onder buitengewone omstandighede sonder kennisgewing, sodanige tydelike voorsiening te eniger tyd te beëindig en die munisipaliteit is nie aanspreeklik vir enige skade of verlies wat die verbruiker as gevolg van sodanige beëindiging mag ly nie.

### **31. Tydelike werk**

Elektriese installasies wat 'n tydelike toevoer van elektrisiteit nodig het, mag nie sonder die skriftelike toestemming van die munisipaliteit regstreeks of onregstreeks by die hoofleiding aangesluit word nie. Volledige inligting oor die redes vir die aard van sodanige tydelike werk moet die aansoek om die bogemelde toestemming vergesel, en die munisipaliteit mag sodanige toestemming weier of verleen soos wat ooreenkomstig die voorwaardes wenslik of noodsaaklik blyk.

### **32. Lasvermindering**

(1) Gedurende tye van spitslas, of in 'n noodgeval, of wanneer dit na die mening van die munisipaliteit om enige rede nodig is om die las op die munisipaliteit se elektrisiteitsvoorsieningstelsel te verminder, kan die munisipaliteit die voorsiening sonder kennisgewing onderbreek vir sodanige tydperk as wat die munisipaliteit nodig ag, en die toevoer van elektrisiteit na enige verbruiker se warmwatersilinder wat deur elektrisiteit verwarm word of na enige spesifieke toestel of die hele installasie beëindig. Die munisipaliteit is nie aanspreeklik vir enige verlies of skade wat regstreeks of gevolglik as gevolg van of voortspruitend uit

sodanige onderbreking en beëindiging van die voorsiening van elektrisiteit ontstaan nie.

(2) Die munisipaliteit kan sodanige apparaat en toerusting op die perseel van die verbruiker installeer as wat nodig geag word om gevolg te gee aan die bepalings van subartikel (1), en enige behoorlik gemagtigde amptenaar van die munisipaliteit kan op enige redelike tyd enige perseel betree met die doel om sodanige apparaat en toerusting te installeer, te inspekteer, te toets, te verstel of te verander.

(3) Nieteenstaande die bepalings van subartikel (2) moet die verbruiker of eienaar, na gelang van die geval, wanneer hy of sy 'n watersilinder installeer wat deur elektrisiteit verwarm word, die nodige akkommodasie en bedrading ooreenkomstig die munisipaliteit se keuse verskaf ten einde die installasie van die apparaat en toerusting bedoel in subartikel (2) later te vergemaklik.

### **33. Hoë-, medium- en laagspanningskakeltuig en toerusting**

(1) In die gevalle van hoë-, medium- of laagspanningelektrisiteitsvoorsiening moet die verbruiker betaal vir die verskaffing en installasie van die skakeltuig, kables en toerusting wat deel van die diensaansluiting uitmaak, tensy dit andersins deur die munisipaliteit of enige behoorlik gemagtigde amptenaar van die munisipaliteit goedgekeur word.

(2) Al sodanige toerusting wat op die verbruiker se perseel geïnstalleer word, moet versoenbaar wees met die munisipaliteit se elektriese prestasiestandaarde.

(3) Niemand mag hoë- of mediumspanningskakeltuig of -toerusting oopmaak, toemaak, isoleer, koppel of aard sonder om vooraf redelike kennis aan die munisipaliteit nie.

(4) In die geval van 'n hoë- of mediumspanningvoorsiening waar die verbruiker hoë- of mediumspanningskakeltuig installeer, moet die munisipaliteit ingelig word oor die bevoegde persoon wat die verbruiker ingevolge die Regulasies aanstel, en van enige veranderinge aan sodanige aanstellings.

(5) In die geval van laagspanningvoorsiening van elektrisiteit moet die verbruiker 'n laagspanninghoofskakelaar of enige ander toerusting vereis deur die munisipaliteit of enige behoorlik gemagtigde amptenaar van die munisipaliteit, verskaf en installeer.

### **34. Substasie-akkommodasie**

(1) Die munisipaliteit mag op sodanige voorwaardes as wat dit goedvind, van die eienaar vereis om akkommodasie te verskaf en in stand te hou bestaande uit 'n substasie met 'n afsonderlike kamer of kamers uitsluitlik vir die doel om mediumspanningskabels en -skakeltuig, transformators, laagspanningskabels en –skakeltuig en ander toerusting noodsaaklik vir die voorsiening van elektrisiteit versoek deur die aansoeker, te akkommodeer. Die akkommodasie sal geleë wees by 'n punt met vrye, voldoende en onbeperkte toegang te alle tye vir die doeleindes wat met die bedryf en instandhouding van die toerusting verband hou.

(2) Die munisipaliteit behou die reg voor om sy eie netwerke te voorsien uit sy eie toerusting wat in sodanige akkommodasie geïnstalleer is, en as die munisipaliteit bykomende akkommodasie verlang, moet sodanige akkommodasie deur die aansoeker op die koste van die munisipaliteit verskaf word.

### **35. Bedradingsdiagram en spesifikasie**

(1) Wanneer meer as een elektriese installasie of toevoer van elektrisiteit van 'n gemeenskaplike hoofleiding verkry word, of meer as een verdeelbord of meter nodig is vir enige gebou of blok geboue, moet die bedradingsdiagram van die stroomkring wat by die hoofskakelaar begin en 'n spesifikasie op versoek aan die munisipaliteit verskaf word vir goedkeuring voordat daar met die werk begin word.

(2) Waar 'n elektriese installasie sy toevoer elektrisiteit vanaf 'n substasie op dieselfde perseel moet kry as waarop die stroom van hoogspanning getransformeer word, of van een van die munisipaliteit se substasies deur 'n hoofleiding afsonderlik van die algemene verspreidingsstelsel, moet, indien dit 'n vereiste is, 'n volledige spesifikasie en tekening van die aanleg wat deur die verbruiker geïnstalleer moet word, aan die munisipaliteit vir goedkeuring gestuur word voordat enige tersaaklike benodigdhede bestel word.

### **36. Bystandstoevoer**

Niemand is geregtig op bystandstoevoer van die munisipaliteit vir enige perseel met 'n afsonderlike bron van toevoer van elektrisiteit nie, behalwe met die skriftelike toestemming van die munisipaliteit en onderworpe aan sodanige voorwaardes as wat deur die munisipaliteit gestel word.

### **37. Verbruiker se toerusting vir noodbystandstoevoer**

(1) Geen toerusting wat deur 'n verbruiker vir noodbystandstoevoer ingevolge enige Regulasies of vir sy of haar eie bedryfsvereistes verskaf is nie, mag by enige installasie aangesluit word sonder die skriftelike goedkeuring van die munisipaliteit nie. 'n Aansoek om sodanige goedkeuring moet skriftelik gerig word en moet 'n volledige spesifikasie van die toerusting en 'n bedradingsdiagram bevat. Die bystandstoerusting moet so ontwerp en geïnstalleer word dat dit onmoontlik vir die munisipaliteit se hoofleiding is om uit die terugvoer van sodanige toerusting bekrag te word. Die verbruiker is verantwoordelik vir die voorsiening en installasie van al sodanige beveiligingstoerusting.

(2) Waar daar ooreenkomstig 'n spesiale ooreenkoms met die munisipaliteit toegelaat word dat die verbruiker se toerusting vir bystandsontwikkeling elektries gekoppel word aan, en parallel loop met, die munisipaliteit se hoofleiding, is die verbruiker verantwoordelik om die vereiste sinchrone en beveiligingstoerusting vereis vir sodanige veilige parallelle werking te verskaf en te installeer tot die munisipaliteit se bevrediging.

### **38. Omsendbriewe**

Die munisipaliteit kan van tyd tot tyd omsendbriewe uitstuur waarin besonderhede verskaf word oor die munisipaliteit se vereistes met betrekking tot sake wat nie spesifiek in die Regulasies of in hierdie verordening bepaal word nie, maar wat nodig is vir die veilige en doeltreffende bedryf en bestuur van elektrisiteitsvoorsiening.

## **HOOFSTUK 2 VERBRUIKERS SE VERANTWOORDELIKHEDE**

### **39. Verbruiker moet elektriese installasie oprig en in stand hou**

Enige elektriese installasie wat by die hoofleiding aangesluit is of aangesluit gaan word, en enige byvoegings daartoe of wysigings daaraan wat van tyd tot tyd gemaak word, moet deur die verbruiker op eie koste verskaf, opgerig en in 'n goeie toestand in stand gehou word ooreenkomstig die bepalings van hierdie verordening en die Regulasies.

### **40. Fout in elektriese installasie**

(1) Indien daar enige fout in die elektriese installasie ontstaan wat 'n gevaar vir mense, diere of eiendom inhou, moet die verbruiker onmiddellik die elektrisiteitstoevoer afsluit. Die verbruiker moet

onverwyld die munisipaliteit in kennis stel hiervan en moet onmiddellik stappe doen om die fout reg te stel.

(2) Die munisipaliteit kan van die verbruiker verwag om die munisipaliteit te vergoed vir enige uitgawes wat die munisipaliteit mag aangaan ten opsigte van 'n fout in die elektriese installasie.

#### **41. Beëindiging van die verbruik van die toevoer van elektrisiteit**

Wanneer 'n verbruiker die verbruik van die toevoer van elektrisiteit wil beëindig, moet hy of sy ten minste twee volle werksdae skriftelike kennis aan die munisipaliteit gee van sodanige beoogde beëindiging, by gebreke waarvan hy of sy aanspreeklik bly vir alle betalings verskuldig ooreenkomstig die tarief vir die voorsiening van elektrisiteit totdat die twee volle werksdae nadat sodanige kennis gegee is, verstryk het.

#### **42. Verandering van okkupeerder**

(1) 'n Verbruiker wat enige perseel ontruim, moet die munisipaliteit nie minder as twee volle werksdae skriftelike kennis gee van sy of haar voorneme om die verbruik van die toevoer van elektrisiteit te beëindig nie, by gebreke waarvan hy of sy aanspreeklik bly vir sodanige toevoer.

(2) Indien die persoon wat die okkupasie van die perseel oorneem, wil voortgaan om die toevoer van elektrisiteit te verbruik, moet hy of sy ingevolge die bepalings van artikel 3 van hierdie verordening daarom aansoek doen, en indien hy of sy versuim om binne tien werksdae nadat hy of sy die nuwe okkupeerder van die perseel geword het, aansoek te doen om 'n toevoer van elektrisiteit, word die toevoer van elektrisiteit afgesluit, en is hy of sy aan die munisipaliteit aanspreeklik vir die toevoer van elektrisiteit vanaf die datum van okkupasie tot en met sodanige tyd as wat die toevoer so afgesluit word.

(3) Waar daar kragbegroters op persele geïnstalleer word, word iemand wat op daardie tydstip die perseel okkupeer, geag 'n verbruiker te wees. Tot tyd en wyl dié persoon aansoek doen om 'n toevoer van elektrisiteit ingevolge artikel 3 van hierdie verordening is hy of sy is aanspreeklik vir alle bedrae en tariewe aan die munisipaliteit verskuldig vir daardie meetpunt asook vir enige uitstaande bedrae en tariewe of dit deur die persoon opgeloopt is of nie.

#### **43. Diensapparaat**

(1) Die verbruiker is aanspreeklik vir al die munisipaliteit se koste voortspruitend uit skade aan of verlies van enige meettoerusting, diensbeveiligingstoestel, diensaansluiting of ander apparaat op die

perseel, tensy daar aangetoon kan word dat sodanige skade of verlies veroorsaak is deur 'n natuurramp of 'n handeling of versuim deur 'n werknemer van die munisipaliteit of deur 'n abnormaliteit in die toevoer van elektrisiteit na die perseel.

(2) Indien die hoofleiding, die dienshoofleiding, meettoerusting of enige ander diensapparaat wat aan die munisipaliteit behoort en tevore gebruik is gedurende 'n tydperk dat die installasie van die hoofleiding afgesluit was, sonder die munisipaliteit se toestemming verwyder is, of in so 'n mate beskadig is dat heraansluiting gevaarlik is, moet die eienaar of okkupeerder van die perseel, na gelang van die geval, gedurende sodanige tydperk die koste dra van die herstel of vervanging van sodanige toerusting.

(3) Waar daar 'n gemeenskaplike meetposisie is, berus die aanspreeklikheid ingevolge subartikel (1) by die eienaar van die perseel.

(4) Die bedrag verskuldig ingevolge subartikel (1) word bewys deur 'n sertifikaat van die munisipaliteit wat finaal en bindend is.

### **HOOFSTUK 3**

#### **SPESIFIEKE VOORSIENINGSVOORWAARDES**

#### **44. Diensaansluiting**

(1) Die verbruiker dra die koste van die diensaansluiting soos deur die munisipaliteit goedgekeur.

(2) Nieteenstaande die feit dat die verbruiker die koste dra van die diensaansluiting wat deur die munisipaliteit gelê of opgerig word, berus die eienaarskap van die diensaansluiting by die munisipaliteit wat verantwoordelik is vir die instandhouding van sodanige diensaansluiting tot by die voorsieningspunt. Die verbruiker is nie geregtig op enige vergoeding van die munisipaliteit ten opsigte van sodanige diensaansluiting nie.

(3) Die werk wat deur die munisipaliteit op die verbruiker se koste gedoen word ten opsigte van 'n diensaansluiting op die verbruiker se perseel, word deur die munisipaliteit of enige behoorlik gemagtigde amptenaar van die munisipaliteit bepaal.

(4) 'n Diensaansluiting word ondergronds gelê ongeag of die hoofleiding ondergronds gelê of bogronds opgerig word tensy 'n bogrondse diensaansluiting spesifiek deur die munisipaliteit vereis word.

(5) Die verbruiker moet op sy of haar perseel sodanige leibane, bedradingskanale, vore, hegstukke en vry ruimte vir die bogrondse

hoofleiding voorsien, vassit of in stand hou soos wat deur die munisipaliteit vir die installasie van die diensaansluiting vereis word.

(6) Die geleier wat vir die diensaansluiting gebruik word, moet 'n deursneeoppervlakte ooreenkomstig die grootte van die elektriese toevoer hê, maar moet nie minder as 10 mm<sup>2</sup> (koper of koperekwivalent) wees nie, en al die geleiers moet dieselfde deursnee oppervlakte hê tensy andersins deur enige behoorlik gemagtigde amptenaar van die munisipaliteit goedgekeur.

(7) Tensy andersins goedgekeur, verskaf die munisipaliteit slegs een diensaansluiting na elke geregistreerde erf. Met betrekking tot twee of meer erwe wat aan een eienaar behoort en op aangrensende erwe geleë is, kan 'n enkele grootmaattoevoer van elektrisiteit voorsien word met dien verstande dat die erwe gekonsolideer of notarieel verbind is.

(8) Enige bedekking op 'n bedradingskanaal wat die toevoerstroomband van die voorsieningspunt na die meettoerusting dra, maak vir verseëling deur die munisipaliteit voorsiening.

(9) Binne in die meterkas moet die diensgeleier of kabel, na gelang van die geval, in 'n opsigtelike posisie eindig, en die hele lengte van die geleiers moet sigbaar wees as die dekplate, indien dit aanwesig is, verwyder word.

(10) In die geval van blokke geboue geokkupeer deur 'n aantal individuele verbruikers, moet afsonderlike bedradingskanale en geleiers of kables van die gemeenskaplike meetkamer of kamers na elke individuele verbruiker in die blokke geboue geïnstalleer word. As hoofleibane gebruik word, moet die geleiers van individuele stroomkringe andersins duidelik (elke 1,5 m saamgebind) vir die hele lengte aangedui word.

#### **45. Meterakkommodasie**

(1) Die verbruiker moet, indien so vereis deur die munisipaliteit of enige behoorlik gemagtigde amptenaar van die munisipaliteit, akkommodasie op 'n goedgekeurde plek vir die meterbord, en voldoende geleiers vir die munisipaliteit se meettoerusting, diensapparaat en beveiligingstoestelle verskaf. Sodanige akkommodasie word tot bevrediging van die munisipaliteit op die verbruiker of eienaar se koste na gelang van omstandighede verskaf en in stand gehou, en moet in die geval van kredietmeters op 'n plek geleë wees waartoe daar te alle redelike tye vrye en onbelemmerde toegang vir die lees van meters is, maar te alle tye vir doeleindes wat met die bedryf en instandhouding van

die dienstoerusting verband hou. Toegang vir die inspeksie van kragbegroters word te alle redelike tye gebied.

(2) Waar submeettoerusting geïnstalleer word, moet akkommodasie afsonderlik van die munisipaliteit se meettoerusting verskaf word.

(3) Die verbruiker of, in die geval van die plek van 'n gewone meter, die eienaar van die perseel, moet voldoende elektriese beligting verskaf in die ruimte waar die meettoerusting en diensapparaat geakkommodeer word.

(4) Wanneer, volgens die mening van die munisipaliteit, die plek van die meter, diensaansluiting of beveiligingstoestelle of hoofverspreidingbord nie maklik bereikbaar is nie, of 'n bron van gevaar vir lewe of eiendom is of op enige wyse ongepas is, moet die verbruiker dit na 'n nuwe plek verskuif, en die koste van sodanige verskuiwing wat met redelike spoed uitgevoer moet word, word deur die verbruiker gedra.

(5) Die akkommodasie vir die munisipaliteit se meettoerusting en beveiligingstoestelle kan, indien goedgekeur, die verbruiker se hoofskakelaar en hoofbeveiligingstoestelle insluit. Geen apparaat behalwe dit wat in verband met die toevoer en verbruik van elektrisiteit gebruik word nie, mag in sodanige akkommodasie geïnstalleer of geberg word nie tensy dit goedgekeur is nie.

## **HOOFSTUK 4 TOEVOERSTELSELS**

### **46. Lasvereistes**

Wisselstroomtoevoer word ingevolge die Elektrisiteitswet, 1987 (Wet 41 van 1987) voorsien en as daar nie 'n ooreenkoms oor gehaltetoevoer aangeaan is nie, ooreenkomstig 'n toepaslike standaardspesifikasie.

### **47. Lasbeperkings**

(1) Waar die geraamde las, bereken ingevolge die veiligheidstandaard, nie 15 kV.A oorskry nie, moet die elektriese installasie ingerig word vir 'n dubbeldraad-enkelfasige-toevoer van elektrisiteit, tensy dit andersins deur die munisipaliteit of enige behoorlik gemagtigde amptenaar van die munisipaliteit goedgekeur word.

(2) Waar 'n driefasige-vierdraad-toevoer van elektrisiteit verskaf word, moet die las min of meer gebalanseer word oor die drie fases, maar die maksimum ongebalanseerde las moet nie 15 kV.A oorskry nie, tensy dit andersins deur die munisipaliteit of enige behoorlik gemagtigde amptenaar van die munisipaliteit goedgekeur word.

(3) Geen toestel wat 'n stroom verbruik, inherent enkelfasig van aard is en 'n aanslag het wat 15 kV.A oorskry, mag by die elektriese installasie aangesluit word sonder dat die munisipaliteit vooraf toestemming gegee het nie.

#### **48. Steuring van ander persone se elektriese toerusting**

(1) Niemand mag elektriese toerusting bedryf wat laseienskappe het wat individueel of gesamentlik tot spanningvariasie, bo-frekwensiestrome of spanning, of ongebalanseerde fase strome wat buite die toepaslike standaardspesifikasie val, aanleiding gee nie.

(2) Die evaluering van die steuring van ander persone se elektriese toerusting word deur middel van metings by die algemene koppelpunt gedoen.

(3) Indien daar vasgestel word dat onbehoorlike steuring wel plaasvind, moet die verbruiker op sy of haar eie koste die nodige toerusting installeer om die steuring te filtreer en te verhoed dat dit die hoofleiding bereik.

#### **49. Toevoer na motore**

Tensy anders goedgekeur deur die munisipaliteit of enige behoorlik gemagtigde amptenaar van die munisipaliteit, word die aangeslane vermoë van motore as volg beperk:

(1) Beperkte grootte van laespanningmotore

Die aangeslane vermoë van 'n laespanning-enkelfasige motor word tot 2kW beperk of die aansitstroom mag nie 70 A oorskry nie. Alle motore wat hierdie perke oorskry, word vir drie fases teen laagspanning of sodanige hoër spanning as wat vereis word, gewikkel.

(2) Maksimum aansit- en versnelstrome van driefasige wisselstroommotore.

Die aansitstrome van driefasige-laespanningmotore wat toegelaat word, hou soos hierbo uiteengesit met die kapasiteit van die verbruiker se diensaansluiting verband:

Grootte van geïsoleerde dienskabel (koperekwivalent)	Maksimum toelaatbare aansitstroom	Maksimum motoraanslag in kW		
		Direk op die lyn (6 x volle lasstroom)	Ster/Delta (2,5 x volle lasstroom)	Ander middele (1,5 x volle lasstroom)
<b>mm<sup>2</sup></b>	<b>A</b>	<b>kW</b>	<b>kW</b>	<b>kW</b>
16	72	6	13,5	23
25	95	7,5	18	30
35	115	9	22	36,5
50	135	10	25	45
70	165	13	31	55
95	200	16	38	67
120	230	18	46	77
150	260	20	52	87

- (3) Verbruikers word teen mediumspanning voorsien  
 In 'n installasie wat elektrisiteit teen mediumspanning voorsien, word die aansitstroom van 'n laespanningmotor tot 1,5 keer die aangeslane vollasstroom van die transformator wat sodanige motor voorsien, beperk. Die aansitreëling vir mediumspanningmotore is aan die goedkeuring van die munisipaliteit onderworpe.

## 50. Kragfaktor

- (1) Indien vereis deur die munisipaliteit, word die kragfaktor van enige las binne die perke van 0,85 naloop en 0,9 voorloop gehandhaaf.
- (2) Waar dit, ingevolge subartikel (1), nodig is om kragfaktor-korrektiewe toestelle te installeer, word sodanige korrektiewe toestelle by die individuele verbruiksterminale aangesluit tensy die herstel van die arbeidsfaktor outomaties beheer word.
- (3) Die verbruiker moet op sy of haar eie koste sodanige korrektiewe toestelle installeer.

## 51. Beveiliging

Elektriese beveiligingstoestelle vir motore moet so ontwerp word dat dit op 'n doeltreffende wyse waar toepaslik volgehoue oorstroom en eenfasewerking voorkom.

## **HOOFSTUK 5 ELEKTRISITEITSMETING**

### **52. Meet van toevoer**

(1) Die munisipaliteit verskaf, installeer en hou toepaslik aangeslane meettoerusting by die meetpunt in stand vir die meet van die elektrisiteit wat voorsien word op koste van die verbruiker in die vorm van 'n direkte bedrag of voorgeskrewe tarief.

(2) Die elektrisiteit wat 'n verbruiker in enige meettydperk verbruik, word, behalwe in die geval van kragbegroters, bepaal deur die toepaslike meter of meters wat deur die munisipaliteit verskaf en geïnstalleer is, aan die einde van sodanige tydperk te lees, behalwe waar daar 'n fout in die meettoerusting is of die munisipaliteit beroep hom op die bepalings van artikel 54(2) van hierdie verordening, in welke geval die verbruik vir die tydperk geskat word.

(3) Waar verskillende tariewe gehef word vir die elektrisiteit wat deur 'n verbruiker verbruik word, word die verbruik afsonderlik vir elke tarief gemeet.

(4) Die munisipaliteit behou die reg voor om die toevoer van elektrisiteit aan blokke winkels en woonstelle, skakelhuse en soortgelyke geboue te meet vir die geboue as 'n geheel, of vir individuele eenhede, of vir groepe eenhede.

(5) Geen veranderings, herstelwerk of toevoegings of elektriese verbindings van enige aard mag aan die voorsieningskant van die meetpunt aangebring word nie, tensy dit spesifiek skriftelik deur die munisipaliteit of enige behoorlik gemagtigde amptenaar van die munisipaliteit goedgekeur word nie.

### **53. Akkurate meting**

(1) Dit word aanvaar dat 'n meter akkuraat registreer indien daar by die toetsing daarvan ingevolge subartikel (5), bevind word dat die fout binne die foutgrens is ooreenkomstig die toepaslike standaardspesifikasies.

(2) Die munisipaliteit het die reg om sy meettoerusting te toets. Indien daar by wyse van 'n toets of andersins vasgestel word dat sodanige

meettoerusting foutief is, moet die munisipaliteit ingevolge die bepalings van subartikel (6) –

- (i) in die geval van 'n kredietmeter die rekening wat gelewer is, aanpas;
- (ii) in die geval van kragbegroters (a) 'n rekening lewer as die meter te min geregistreer het, of (b) 'n gratis bewys uitreik indien die meter te veel geregistreer het.

(3) Die verbruiker is daarop geregtig om teen betaling van die voorgeskrewe tarief die meettoerusting deur die munisipaliteit te laat toets. Indien daar bevind word dat die meettoerusting nie voldoen aan die vereistes vir stelselakkuraatheid ooreenkomstig die toepaslike standaardspesifikasies nie, word 'n aanpassing ingevolge die bepalings van subartikels (2) en (6) gemaak en die bogemelde tarief word terugbetaal.

(4) In geval van 'n geskil het die verbruiker die reg om op eie koste die meettoerusting waaroor die geskil gaan, deur 'n onafhanklike toetsowerheid te laat toets, en die resultaat van sodanige toets is afdoende bewys en bindend op albei partye.

(5) Meters word getoets op die wyse soos deur die toepaslike standaardspesifikasie bepaal.

(6) Wanneer die elektrisiteitsverbruik soos geregistreer op 'n meter ingevolge subartikel (2) of (3) aangepas word, word sodanige aanpassing óf gegrond op die meter se persentasiefout bepaal deur die toets ingevolge subartikel (5), óf op 'n berekening deur die munisipaliteit gegrond op verbruiksdata in sy besit. Waar van toepassing word daar, waar moontlik, behoorlik rekening gehou met seisoenale of ander veranderinge wat die verbruik van elektrisiteit kan beïnvloed.

(7) Enige aanpassings ingevolge subartikel (6) word gemaak ten opsigte van 'n tydperk wat nie ses maande voor die datum waarop bevind is dat die meettoerusting onakkuraat is, mag oorskry nie.

(8) Waar 'n verbruiker se werklike las in so 'n mate van die aanvanklik geraamde las ingevolge subartikel 47(1) verskil dat die munisipaliteit dit nodig ag om sy meettoerusting te verander of te vervang ten einde by die las aan te pas, dra die verbruiker die koste van sodanige verandering of vervanging.

(9) (a) Voordat die raad enige opwaartse aanpassing aan enige rekening ingevolge subartikel (6) maak, moet die munisipaliteit –

- (i) die verbruiker skriftelik in kennis stel van die geldelike waarde van die aanpassing wat gemaak gaan word en die redes daarvoor;
  - (ii) in sodanige kennisgewing voldoende besonderhede verskaf sodat die verbruiker verhoë op grond daarvan kan rig, en
  - (iii) die verbruiker in sodanige kennisgewing versoek om redes, indien enige, skriftelik binne 21 dae of sodanige langer tydperk as wat die munisipaliteit mag toelaat, te verskaf waarom sy of haar rekening nie aangepas moet word ooreenkomstig die kennisgewing nie.
- (b) Indien die verbruiker versuim om gedurende die tydperk beoog in subartikel 9(a)(iii) enige verhoë te rig, het die munisipaliteit die reg om die rekening aan te pas volgens die kennisgewing ingevolge subartikel 9(a)(i).
  - (c) Die munisipaliteit oorweeg enige redes verskaf deur die verbruiker ingevolge subartikel (9)(a) en pas die rekening op 'n gepaste wyse aan indien die munisipaliteit tevrede is dat daar grondige redes daarvoor verskaf is.
  - (d) Indien 'n behoorlik gemagtigde amptenaar van die munisipaliteit na oorweging van die verhoë gerig deur die verbruiker besluit dat sodanige verhoë nie 'n saak uitmaak om 'n wysiging aan die monetêre waarde ingevolge subartikel 9(a)(i) aan te bring nie, het die munisipaliteit die reg om die rekening ooreenkomstig 'n kennisgewing ingevolge subartikel 9(a)(i) aan te pas, onderworpe aan die verbruiker se reg van appèl teen die besluit ingevolge artikel 62 van hierdie verordening.

#### 54. Lees van kredietmeters

- (1) Tensy anders voorgeskryf, word kredietmeters gewoonlik met tussenposes van een maand gelees, en die vaste of minimum koste verskuldig ingevolge die tarief word dienooreenkomstig bepaal. Die munisipaliteit is nie verplig om enige aanpassings aan sodanige koste te maak nie.
- (2) Indien die kredietmeter om die een of ander rede nie gelees kan word, kan die munisipaliteit 'n geraamde rekening lewer. Die elektriese

energie wat verbruik is, word in 'n daaropvolgende rekening aangepas ooreenkomstig die elektriese energie wat werklik verbruik is.

(3) Wanneer 'n verbruiker 'n eiendom ontruim en 'n finale lesing van die meter is onmoontlik, kan 'n geraamde verbruik bepaal word en die finale rekening dienooreenkomstig gelewer word.

(4) Indien 'n verbruiker 'n finale meterlesing verlang, kan dit teen betaling van die voorgeskrewe tarief gedoen word.

(5) Indien enige berekeningsfout, fout met die lees van die meter of meetfout ontdek word ten opsigte van enige rekening wat aan 'n verbruiker gelewer is, word die fout in daaropvolgende rekeninge reggestel. Enige sodanige regstelling is slegs van toepassing op rekeninge vir 'n tydperk van 6 maande voor die datum waarop die fout in die rekening ontdek is, en is gegrond op die werklike tariewe van toepassing gedurende die tydperk. Die toepassing van hierdie artikel verhoed nie 'n verbruiker om oorbetalings terug te eis vir enige langer tydperk nie indien die verbruiker die eis in die normale regsproses kan bewys.

## **55. Kragbegroter**

(1) Geen terugbetaling van die bedrag wat vir die aankoop van elektrisiteitskrediet aangebied is, geskied by die verkooppunt nadat die proses waardeur die kragbegroterbewys uitgereik word, reeds begin het nie.

(2) Afskrifte van die bewyse wat vroeër vir die oorplasing van krediet na die kragbegroter uitgereik is, kan op versoek van die verbruiker beskikbaar gestel word.

(3) Wanneer 'n verbruiker enige perseel ontruim waar 'n kragbegroter geïnstalleer is, betaal die munisipaliteit geen krediet wat in die meter oorbly, aan die verbruiker terug nie.

(4) Die munisipaliteit is nie aanspreeklik vir die herstel van krediet wat in 'n kragbegroter verlore gegaan het omdat daar met die kragbegroter of bewyse gepeuter is nie, of omdat dit verkeerd gebruik of misbruik is nie.

(5) Waar die verbruiker geld aan die munisipaliteit verskuldig is vir elektriese verbruik of vir enige diens wat deur die munisipaliteit verskaf word (onder meer diensgeld) of vir enige tarief wat voorheen teen hom of haar gehef is betreffende enige diens verskaf, kan die munisipaliteit 'n persentasie van die bedrag wat aangebied word, aftrek totdat die verskuldigde bedrag verhaal is soos uiteengesit in die artikel 3-ooreenkoms vir die voorsiening van elektriesiteit.

(6) Die munisipaliteit kan na goeddunke verkopers vir die verkoop van bewyse vir kragbegroters aanstel en waarborg nie die voortgesette bedryf deur enige verkoper nie.

## **HOOFSTUK 6 ELEKTRIESE KONTRAKTEURS**

### **56. Elektriese Kontrakteurs**

Benewens die vereistes van die Regulasies is die volgende vereistes van toepassing:

(1) Waar daar om nuwe of verhoogde toevoer van elektrisiteit by die munisipaliteit aansoek gedoen word, kan enige behoorlik gemagtigde amptenaar van die munisipaliteit na sy of haar goeddunke kennisgewing aanvaar van die voltooiing van enige deel van die elektriese installasie waarvan die kringontwerp toelaat dat die elektriese installasie in duidelik afgebakende afsonderlike gedeeltes verdeel word, en sodanige gedeelte van die elektriese installasie kan na goeddunke van die munisipaliteit geïnspekteer, getoets en by die hoofleiding aangesluit word asof dit 'n volledige installasie is.

(2) Die ondersoek, toets en inspeksie wat na goeddunke van die munisipaliteit of enige behoorlik gemagtigde amptenaar van die munisipaliteit uitgevoer mag word, onthef geensins die elektriese kontrakteur of geakkrediteerde persoon of die verbruiker of huurder, na gelang van die geval, van sy of haar verantwoordelikheid vir enige gebrek in die installasie nie. Sodanige ondersoek, toets en inspeksie mag onder geen omstandighede (selfs waar die elektriese installasie aan die hoofleiding verbind is) beskou word as enigsins 'n aanduiding of waarborg dat die elektriese installasiewerk doeltreffend met die geskikste benodighede vir die doel uitgevoer is of dat dit ooreenkomstig hierdie verordening of veiligheidstandaard is nie, en die munisipaliteit kan nie aanspreeklik gehou word vir enige gebrek of fout in sodanige elektriese installasie nie.

### **57. Aanspreeklikheid**

Die munisipaliteit kan nie aanspreeklik gehou word vir die werk wat deur 'n elektriese kontrakteur of geakkrediteerde persoon op die perseel van die verbruiker verrig word nie en kan hoegenaamd nie aanspreeklik gehou word vir enige verlies of skade te wyte aan 'n brand of enige

ongeluk voortspruitend uit die toestand van die bedrading op die perseel nie.

## **HOOFSTUK 7 KOSTE VAN WERK**

### **58. Koste van Werk**

Die munisipaliteit mag enige skade wat strydig met hierdie verordening is of voortspruit uit 'n oortreding van hierdie verordening, herstel of vergoed. Die koste van sodanige werk verrig deur die munisipaliteit en genoodsaak deur 'n oortreding van hierdie verordening, is vir die rekening van die persoon wat strydig met hierdie verordening opgetree het.

## **HOOFSTUK 8 ENERGIEBESPARINGSMAATREËLS EN VERMINDERDE GEBRUIK VAN ELEKTRISITEIT**

### **59. Norme, standaard en riglyne**

(1) Die munisipaliteit mag norme, standaard en riglyne daarstel en publiseer wat gepaste maatreëls daarstel vir die besparing van energie en vir verminderde verbruik van elektrisiteit, en sodanige norme, standaard en riglyne moet in die vorm van 'n operasionele handleiding bygehou word.

(2) Die norme, standaard en riglyne waarna in subartikel (1) verwys word, mag tussen gemeenskappe, geografiese gebiede en verskillende tipes persele onderskei.

## **HOOFSTUK 9 ALGEMENE BEPALINGS**

### **60. Vrystellings**

(1) Enigiemand mag skriftelik by die munisipaliteit aansoek doen om vrystelling van enige bepaling van hierdie verordening.

(2) Die munisipaliteit mag –

(a) skriftelik vrystelling verleen en die tydperk waarvoor sodanige vrystelling verleen word, bepaal en vasstel;

- (b) enige vrystelling of voorwaarde in 'n vrystelling wysig of kanselleer; of
- (c) weier om vrystelling toe te staan.
- (3) 'n Vrystelling tree nie in werking voordat die aansoeker skriftelik onderneem het om te voldoen aan die voorwaardes wat deur die munisipaliteit opgelê word nie; met dien verstande verder dat indien die aansoeker met die betrokke aktiwiteit begin voordat sodanige onderneming aan die munisipaliteit voorgelê is, die vrystelling verval.
- (4) Indien daar nie aan 'n voorwaarde van 'n vrystelling voldoen is nie, verval die vrystelling onmiddellik.

### **61. Skakelforums in gemeenskap**

- (1) Die munisipaliteit mag een of meer skakelforums in 'n gemeenskap stig vir die doel om gemeenskapsdeelname te verkry in die aangeleenthede wat in hierdie verordening behandel word.
- (2) 'n Skakelforum kan uit die volgende bestaan –
  - (a) 'n lid of lede van 'n belangegroep, of 'n persoon wat geraak word;
  - (b) 'n aangewese beampte of beamptes van 'n munisipaliteit; en
  - (c) 'n raadslid.
- (3) (a) Die munisipaliteit mag, wanneer 'n aansoek om toestemming, 'n permit of vrystelling ingevolge hierdie verordening oorweeg word, om die inset van 'n skakelforum vra.
- (b) 'n Skakelforum of enige persoon mag op sy of haar eie inisiatief 'n inset aan die munisipaliteit lewer vir laasgenoemde se oorweging.

### **62. Appèl**

Iemand wie se regte geraak word deur 'n besluit wat deur die munisipaliteit gedelegeer is, mag ingevolge Artikel 62 van die Wet op Plaaslike Regering : Munisipale Stelsels, Wet 32 van 2000 teen die besluit appèl aanteken by wyse van skriftelike kennisgewing van die appèl en die redes daarvoor aan die Munisipale Bestuurder binne 21 dae van die datum van kennisgewing van die besluit.

### **63. Strafbepalings**

Iemand wat enige van die bepalings van artikels 5, 6, 11,12,13, 19, 23, 24, 25, 27 en 28 van hierdie verordening oortree, pleeg 'n misdryf en kan by skuldigbevinding –

- (a) 'n boete of gevangenisstraf opgelê word, of sodanige boete of gevangenisstraf, of beide sodanige boete en sodanige gevangenisstraf; en
- (b) in die geval van 'n voortgesette misdryf, 'n bykomende boete of 'n bykomende tydperk van gevangenisstraf of sodanige bykomende gevangenisstraf sonder die opsie van 'n boete of beide sodanige bykomende boete en gevangenisstraf vir elke dag waarop sodanige misdryf voortduur; en
- (c) 'n verdere bedrag gelyk aan enige koste en uitgawes wat die hof bevind deur die munisipaliteit aangegaan is weens sodanige oortreding of versuim.

### **64. Teenstrydigheid met ander wetgewing**

In die geval van teenstrydigheid tussen enige bepaling van hierdie verordening en Nasionale- en Provinsiale wetgewing, standarde, beleid of riglyne, sal sodanige Nasionale- en Provinsiale wetgewing, standarde, beleid of riglyne voorrang geniet.

### **65. Herroeping van verordeninge**

Die bepalings van enige verordeninge wat voorheen deur die munisipaliteit of deur enigen van die afgeskafte munisipaliteite wat nou in die munisipaliteit geïnkorporeer is, afgekondig is, word hiermee herroep in soverre hulle betrekking het op sake waarvoor daar in hierdie verordening voorsiening gemaak word.

### **66. Kort titel en inwerkingtreding**

Hierdie verordening staan bekend as die Verordening insake Elektrisiteitsvoorsiening en tree in werking op die datum van die publikasie daarvan in die Provinsiale Koerant.